



**MOLAETSA OA MAHLOHONOLO A
KERESEMESE OA MOHLOMPHEHI
TONA-KHOLO**

DR. MOTSOAHAE THOMAS THABANE

HO SECHABA SA BASOTHO

24 TŠITOE, 2018

Ke ea le lumelisa Sechaba sa heso ha e le mona re kene nakong ea Keresemese, e le nako eo re hopolang beng ka rona le metsoalle.

Ke boela ke tla ho lona ka thabo e kholo Sechaba sa Thesele ha e le mona e le mafelo a selemo ke tliho fana ka molaetsa oa Keresemese, e leng nako ena eo re ketekang tsoalo ea Morena oa rona Jesu Kriste. Re ea tseba ho latela buka ea libuka hore Kriste o ile a romeloa lefatšeng ho tla pholosa bana ba Molimo. Ke ka hona ho leng molemo hore mafelo a selemo se seng le se seng rona ba ntseng ba phela lefatšeng, re hetleng morao ho sheba hore na ho tloha qalong ea selemo re nepile kae, ra fosa ho kae mme re lokise moo e bang re ile ra hata ka lebatha.

Ho molemo hee Sechaba sa heso hore ke bolele mona tseo re le 'Muso oa lona oa 4x4 re atlehileng ho li fihlela selemong sena sa 2018, hape re bontše le moo re ileng ra thulana le liqholotso teng. Selemong sena re atlehile ho ntšetsa pele morero oa "Tlhopho Bocha" (National Reforms) moo teng re atlehileng ho feta methati e mengata empa ntumelleng ho qolla feela tse kholohali tse latelang:

1. Re atlehile ho tšoara 'Moka oa Baetapele (National Leaders Forum) o ileng oa atleha hoholo oa ba oa re tsoalla Komiti e tla tsamaisa lithophiso tsa morero oa Tlhopho-Bocha e leng "National Dialogue Planning Committee". Komiti ena e entsoe ka litho tse leshome le metso e mehlano (15) tse khethiloeng e le baemeli ba boetelli pele

bohle bo teng ka hare ho naha ea Lesotho, mme e tla sebetsa ho fihlela mekhahlelo eohle ea 'Moka oa Sechaba e felile.

2. Sena se ile sa lateloa ke 'Moka oa pele o Moholo (Multi-Stakeholder National Dialogue) o ileng oa tšoareloa mane Holong ea Liboka ea 'Manthabiseng ho tloha ka la 26 ho fihlela la 28 Pulungoana, 2018. Ke tebello ea rona joale hore ka morao ho 'Moka ona, eona Komiti ena e tla etela litereke kaofela tse leshome ho fumana maikutlo a Sechaba mabapi le Thlopho-Bocha.

3. Sechaba sa heso, re bone hape hore e 'ngoe ea likatleho tsa Tlhopho-Bocha ke ho khutlela ka hara naha hoa Baetapele ba Mekha ea Lipolotiki ba neng ba ntse ba le palehong naheng ea boahelani ea Afrika Boroa. Sena ke sesupo sa hore bohle re tsitsilela khotso le bokamoso bo ntlafetseng ba naha ea rona.

4. Ke motlotlo hape ho le bolella Sechaba hore nakong ena ea selemo le likhoeli tse tšeletseng, 'Muso oa lona oa 4X4 o se o atlehile ho etela litereke tse tšeletseng, e leng, Mafeteng, Botha-Bothe, Quthing, Leribe, Mohale's Hoek le Berea moo teng re ntseng re tlalehela Sechaba ka likatleho tseo re li fihletseng esale re nka Puso le ho

fumana liqholotso tse tobileng Babusi ba Litereke hammoho le Makhotla a Puso ea Libaka tse ba sitisang ho fetisetsa litšebeletso sechabeng ka mokhoa oo ho lebeletsoeng kateng. Sepheo se seholo ke hore re be 'Muso o phethahatsang litšepiso tseo re ileng ra li etsetsa Sechaba ha re ntse re iketela likhetho eseng feela ka lipuo.

Re le naha re boela re ikotla sefuba ka hore selemong sena sa 2018/2019, Lesotho le boetse le ipabotse lintlheng tseo 'Muso oa America, ka Millennium Challenge Corporation (MCC) e li hlahlobang hore ha li fihletsoe hantle ke linaha tse tšoanang le Lesotho ka maemo a moruo oa tsona e le ho ntlafatsa maphelo a baahi ba linaha tse joalo, e be MCC e boela e tsoela pele ho sebetsa le tsona.

Selemong sena, tlaleho ea lintlha tsa MCC (MCC Scorecard) e hlahisa naha ea Lesotho e sebelitse hantle, ebile e fumanoe e ntse e e-na le bokhoni ekasita le boikitlaetso ba ho laola bobolu (Control of Corruption), ebile e le naha e hlomphang litokelo tsa manthla tsa botho (Human and Political Rights).

Holima lipehelo tse mashome a mabeli (20), Lesotho le fumanoe le sebelitse hantle lipehelong tse leshome le metso e tšeletseng (16). Le ha ho le joalo re tlameha ho sebetsa ka thata-thata lipehelong tsena tseo re bonahetseng re khibela ho tsona mme ke se ke laetse Matona a amehang ho shapa pere.

Re le naha, re ile ra atleha hape ka Ofisi ea Mohatsa oa Tona-Kholo, ho tšoara 'moka o moholo ka tlhokomeliso ea lefu lena leo ho bonahalang le hohola sechaba sa lefatše ka bophara la Kankere

(Cancer). Linaha tsa Afrika li ne li bokane mona ka khoeli ea bosupa ho tla arolelana maikutlo le ho thakelana malebela hore na kholumo-lumo ena re tla e hlola joang. Mme sena se re tsoaletse hoba monyetleng oa khaho ea Litsi tse tla shebana feela le ho loantš'a lefu lena joalokaha re ile ra etsa ka lefu la HIV le AIDS lilemong tse mmaloa tse fetileng.

Tse ling tsa likatleho tse kholo tseo re li fihletseng li akha ntlafatso ea meputso ea basebetsi ba lifeme, theko le thekiso ea boea Lesotho ka lipereisi tse ntle ho feta ha re ne re bo isa mabopong kantle ho naha.

Re ka li lokolisa li le ngata likatleho tsa 'Musu, empa tsena tseo ke li supileng ke tse ka sehlohlolong hobane ke tse amang ka kotloloho maphelo a baahi ka bo-mong metseng le metsaneng ea rona hobane li bua ka kholo le kholiso ea moruo.

Sechaba sa heso, le ha ke supile tse ling tsa likatleho tseo re li fihletseng, ha ho bolele hore liqholotso ha li eo. Hara tse ling tse re tobileng e le liqholotso re le naha, e kholo ke hore mokotla oa sechaba o theohile haholo hoo re seng re tlamehile ho itlama mala masesane likarolong tse ngata tsa tšebetso ea letsatsi le letsatsi. Mme re le 'Musos re ntse re sebetsa ka matla a maholo ho tla ka maano a macha a tla re thusa ho bokella chelete le ho nyolla moruo oa naha ka kakaretso. Mehlala e phelang ke ho ntlafatsa bohahlaoli le ho hohela bo ramatsete ba tsoang kantle ekasitana le hona ho atolosa litsela tse kenellang metseng le metsaneng.

Re etse hloko hape liqholotso tseo li ntseng li tobile matichere, lingaka ekasitana le litsi tse ling tsa 'Musos malebana le litsiane tsa bona le maemo a tšebetso ka kakaretso. Ka hona le tsona tsena le tse ling tse

tla nne li hlahe re malala-a laotsoe ho ema le lona Sechaba tharolong ea mathata ana kaofela.

Ha ke qetella litaba tsa ka ke nka monyetla ona ho lakaletsa Motlotlehi Hlooho ea Naha le Lelapa La hae le e mong e mong oa lona Keresemese e monate le mahlohonolo a selemo se secha. Bohle ba tlang ho nka maeto, khannang hantle mebileng. Ke nnete ke nako ea thabo empa ha re hopoleng hore tahi e fetang tekano le eona ha e tlise thabo empa e ka re bakela bolutu bo bongata bo ka tliisoang ke likotsi tsa mebileng, lintoa tse sa hlokahaleng le tse ling tse ngata.

Kamehla hopolang ho keteka ka boikarabello le boitlhompho molemong oa paballo ea maphelo le thepa.

Kaholimo ho tsohle ha re eeng likerekeng re rapelle rona le malapa a rona.

MOLIMO O BOLOKE LESOTHO LE BASOTHO

KHOTSO! PULA! NALA!